

21.12.2022.



Sinoć je u organizaciji Udruženja poslodavaca BPK Goražde održana manifestacija: „Večer uspješnih poslovnih priča“, na kojoj su dodjeljena priznanja za 8 privrednih subjekata koji su ostvarili najveću dobit u 2021. godini u kategoriji velikih, srednjih i malih pravnih lica.

U kategoriji velikih pravnih lica priznanja su dobili privredni subjekti

1. UNIS „Ginex“ d.d. Goražde
2. „Emka Bosnia“ d.o.o. Goražde
3. „Pobjeda rudet“ d.d. Goražde

U kategoriji srednjih pravnih lica priznanja su dobili privredni subjekti:

1. „AC-Unity“ d.o.o.. Goražde
2. „Prevent safety“ d.o.o. Goražde

U kategoriji malih pravnih lica priznanja su dobili privredni subjekti:

1. „EBI“ d.o.o. Goražde
2. „Okac“ d.o.o. Goražde

3. „TZS Export-import“ d.o.o. Goražde



Priznanja u kategoriji malih pravnih lica uručio je predsjedavajući gradskog vijeća Grada Goražde gosp. Bajro Obuća, u kategoriji srednjih pravnih lica predsjednica Udruženja poslodavaca BPK Goražde g-đa Šejla Bojadžija, dok je u kategoriji velikih pravnih lica priznanja uručio premijer BPK Goražde gosp. Edin Ćulov.

Prisutnima se najprije obratila predsjednica Udruženja poslodavaca BPK Goražde g-đa Šejla Bojadžija koja je poželjela svim prisutnim toplu dobrodošlicu, čestitala dobitnicima priznanja, te zaželjela mnogo poslovnog uspjeha svim privrednim subjektima sa područja BPK Goražde.

Predsjedavajući gradskog vijeća Grada Goražde gosp. Bajro Obuća je čestitao organizatoru na uspješno organizovanoj manifestaciji te također poželio poslodavcima da postižu još bolje poslovne rezultate a da će grad Goražde uvijek stajati na raspolaganju poslodavcima za sve ono što je u ingerenciji grada Goražde, odnosno gradskog vijeća.

Također, čestitke dobitnicima priznanja uputio je premijer BPK Goražde gosp. Edin Ćulov, kao i organizatoru ove manifestacije.

Kazao je da želi dobru saradnju sa Udruženjem poslodavaca BPK Goražde i svim poslodavcima, te da će Vlada BPK Goražde, odnosno ministarstvo za privredu BPK Goražde stajati na raspolaganju za sve inicijative koje budu došle a sve u cilju stvaranja boljeg poslovnog ambijenta na području BPK Goražde.

Na manifestaciji su bili također prisutni ministar za privredu BPK Goražde gosp. Mithat Hadžiomerović, načelnik općine Foča-FBIH gosp. Mujo Sofradžija i načelnik općine Pale FBIH gosp. Almin Ćutuk.



Uprkos teškoj i izazovnoj 2021. godini, poslodavci s područja BPK Goražde su ostvarili izuzetne rezultate, sa ukupno ostvarenom dobiti u iznosu od 36.047.024 KM što je za 68,82 posto više u odnosu na 2020.godinu, dok su ukupni prihodi iznosili 399.182.878 KM, odnosno 27 posto više u odnosu na godinu ranije.

“ Ovo su rezultati 189 privrednih subjekata koji zapošljavaju ukupno 4.395 radnika, a mi smo na ovaj način željeli da istaknemo one najbolje, ali time nimalo ne zanemarujući sve druge, jer svaki poslodavac je bitan i onaj što zapošljava jednog radnika i onaj što zapošljava 700 radnika i više. Želimo da se zahvalimo svim privrednicima, a posebno onim koji su svojim uspješnim radom, zapošljavanjem novih radnika i rastom prihoda, značajno doprinjeli javnim budžetima, te sveukupnom privrednom i ekonomskom razvoju ovog kantona i makar na simboličan način da im odamo priznanje za sve što čine godinama i decenijama na razvoju ovog dijela BiH“ – kazala je predsjednica Udruženja poslodavaca BPK Goražde Šejla Bojadžija.

Naglasila je da su privredni subjekti iz BPK Goražde već odavno prepoznatljiviji ne samo u BiH već i u širim evropskim i svjetskim okvirima, te da su izuzetno važan faktor, bez kojeg bi ova zemlja bilježila znatno manje indekse razvoja industrije.





